

por Xurde Fernández Fernández, en La Voz de Lena
lavozdelena@yahoo.es

Unes notes sobre'l gochu asturcelta
en La última (12)
La Voz de Lena

por Xurde Fernández

Yá en tiempos de los castros n'Asturies esistíen gochos que nun debíen ser como los que tamos avezaos a ver, sinón los gochos asturceltes que tuvieron presentes na nuestres ganaderíes dende aquel tiempu hasta bien entráu'l sieglu XX qu'entamó a desaparecer hasta llegar cuasi a tar desaniciu dafechu. Anguaño gracias a l'Asociación de Criadores (qu'ayuda a la crianza, que fai visible al gochu asturcelta na sociedá...) ta recuperándose la especie aunque entá nun se llegó a dexar la denominación d'animal en peligru de desapaición. Y en L.lena existen dellos criadores que trabayen con esti animal autóctonu

Paez ser que nos tiempos de los castros los habitantes d'estes tierres yá curiaben el gochu'l país o'l gochu asturcelta y comíen la so carne. Sabémoslo porque nel castru de La Campa Torres apaecieron setecientos sesenta y seis restos de gochu, que pertenecen a sesenta y cinco exemplares y nel de Cellagú (Uviéu) foron identificaos restos d'otros trenta y tres exemplares. Esti gochu podemos describilu asina: tiesta grande, de bon anchor, allongada y perfil subcóncau; güeyos pequeños; oreyes llargues, cayíes y echaes p'alantre, focicu primíu y garruchu, cola tortoria ancha; pescuezu estrechu y llargu; llombu dalgo enarquiáu (gorrumbu) y estrenchu, ancla cayida y costillar aplanáu, bandoba metida; seis pares de tetos como mínimu; testículos permediaos en llonxítu y tamañu; pates llargues y güesudes, pezuños enforma duros; pesu ente 130 y 200 kilos; altura que llega a los cien centímetros; llargor que de la nucla a la freba'l rau allega en dellos exemplares a metru y mediu; rau perllargu, ensin tar enroscáu, con serdes pel cabu; color blanco, prieto y pezo o brazalbo.

En dómina romana Estrabón diznos que les piernes de los gochos de los ástures yeren tan buenos como les de los gochos de Cerdeña.

Dende'l sieglu XVIII na mayor parte de les parroquies d'Asturies les Xuntes Vecinales dictaben normes sobre los gochos pa que foren torgaos y asina nun fozaren pel monte. A la xente que nun cumplía estes normes, poníense-yos bones multes.

Nel sieglu XX yá hai estudios que falen más detallao de les característiques morfolóxicques de estos gochos, asina en 1917 Santos Arán nel so tratáu «Ganado de cerda. Explotación e industrialización del cerdo», diz que la raza principal ganadera porcina asturiana ta formada por animales de castra céltica de color prieto y con carne perbono. La so descripción morfolóxica fala d'animales de gran tiesta, oreyes perallargaes prolongaes y cayíes y echaes p'alantre, güeyos pequeños y brillosos, capa color prieto y pelo non mui llargo, llombu dalgo enarquiáu, cuerpu aplanáu, y pates llargues.

En 1947, Fernando Albuquerque asoleya'l so llibru *La Riqueza en la Mano. El Cerdo. Cómo se ganan cinco mil duros en seis meses* nel que s'asoleya un grabáu d'un gochu de raza asturiana nel que destaquen les sos llargues oreyes, llombu encumáu y rau ensin facer redolinos. L'autor descríbelu asina: «Dentro de las razas

por Xurde Fernández Fernández, en La Voz de Lena
lavozdelena@yahoo.es

indígenas y rústicas, nosotros tenemos muy buenos cerdos, y en Asturias hay un cerdo negro productor del famoso jamón serrano, delicia de los gourmands españoles. Se les cría, como en Extremadura, al aire libre».

Pero a esi gochu que daba tan bonos xamones nun-y quedaba munchu tiempu pa llegar a desaparecer. Les estadístiques oficiales dicenlo asina, yá que nos daben en 1955, pa tol Estáu, un censu de 224.000 goches paridiegues pertenecientes al tueru célticu. En 1970 estes cifres amenorgaren a 94.000 exemplares, baxando en 1974 a 42.000, pa desaparecer dafechu de los censos del Ministeriu d'Agricultura en 1978 quiciabes pola apaición nes ganaderíes asturianas de gochos d'otres races.

Pero hebo xente que percorrió pueblos y brañes a la gueta de los últimos exemplares d'esta raza col envís de recuperala. Asina'l trabayu de recuperación imprimó con tres goches paridiegues y un berrón en 1998. Daquella yeren namái que dos los criadores. Na seronda del 2000 atopense una parexa (llabascu y gocha) nueva. Sele que sele axntáronse otros criadores y en 2004 yá yeren 8 los que formaben l'Asociación de Criadores, con un censu de 5 berrones y 9 goches matrices. Y en 2005 l'Asociación de Criadores ye a que'l Principáu d'Asturies, al traviés del SERIDA, entame a trabayar na recuperación del gochu asturianu iguando un centru de recuperación.

Anguaño'l censu d'esti gochu fala de, aproximadamente, 80 criadores y 800 gochos asturceltes.

por Xurde Fernández